

V E N D I M
Nr.126, datë 27.2.2003

**PËR KRITERET E DHËNIES SË LEJES TË PËRPUNIMIT INDUSTRIAL DHE/OSE TË
PRODHIMIT TË PRODUKTEVE TË DUHANIT**

Në mbështetje të nenit 100 të Kushtetutës dhe të nenit 14 të ligjit nr.8691, datë 16.11.2000 “Për prodhimin dhe tregtimin e duhanit dhe të cigareve”, i ndryshuar, me propozimin e Ministrit të Bujqësisë dhe të Ushqimit, Këshilli i Ministrave

V E N D O S I:

1. Për dhënien e lejes së përpunimit industrial dhe/ose prodhimit të produkteve të duhanit, të bëhet kërkesë me shkrim pranë Agjencisë Kombëtare të Duhan-Cigareve (AKDC), e cila të shoqërohet me:

- a) Vendimin e gjykatës për regjistrimin e personit fizik ose juridik.
- b) Vërtetimin për shlyerjen e detyrimeve nga organet tatimore, vetëm për subjektet që e ushtrojnë aktualisht këtë veprimtari dhe për subjektet që kryejnë veprimtari tjetër biznesi.
- c) Të dhënat për kushtet teknike dhe teknologjinë e instaluar, ku të përfshihen:

I. Projekti teknologjik i përpunimit industrial dhe/ose i prodhimit të produkteve të duhanit me elementet si më poshtë vijon:

- përshkrimi i mjedisit (mjediset kryesore dhe ndihmëse);
- pajisjet e instaluara, proceset teknologjike (përshkrimi i shkurtër i teknologjisë së prodhimit) dhe kapacitetet e prodhimit;
- lëndët e para dhe ndihmëse dhe karakteristikat kryesore të tyre;
- produktet e gatshme dhe karakteristikat kryesore të tyre (kryesisht për mbrojtjen e shëndetit të konsumatorëve).

II. Standardi me të gjithë treguesit cilësorë të sigurisë.

III. Ambalazhimi, etiketimi, ruajtja dhe transportimi i produkteve të gatshme.

IV. Afatet e garancisë ose jetëgjatësisë së produktit/data e prodhimit.

V. Krjimi dhe largimi i mbetjeve teknologjike të mundshme.

VI. Të dhëna të tjera për rastet e prodhimeve të veçanta.

2. Leja e përpunimit industrial dhe/ose e prodhimit të produkteve të duhanit merret pasi të jetë kryer vlerësimi i të dhënave për kushtet teknike dhe teknologjinë e instaluar dhe pasi të shlyhet tarifa përkatëse, që përcaktohet nga Ministri i Financave e Ministri i Bujqësisë dhe i Ushqimit dhe administrohet nga AKDC-ja, në përputhje me aktet ligjore dhe nënligjore. Vlerësimi i të dhënave për kushtet teknike dhe teknologjinë e instaluar të bëhet nga Komisioni i Ekspertëve pranë AKDC-së, i cili ngrihet me urdhër të Ministrit të Bujqësisë dhe Ushqimit.

3. Nëse personat fizikë dhe juridikë, vendas dhe të huaj, që kryejnë përpunimin industrial të duhanit dhe prodhimin e produkteve të tij, nuk paraqesin lejen e përpunimit industrial dhe/ose lejen e prodhimit të produkteve të duhanit, organet tatimore nuk i regjistrojnë ata.

4. Afati i pajisjes me lejen e përpunimit industrial dhe/ose prodhimit të produkteve të duhanit është 30 ditë nga çasti i dorëzimit të kërkesës pranë AKDC-së. Pajisja me leje bëhet sipas formatit tip, të miratuar nga Ministri i Bujqësisë dhe i Ushqimit. Leja e përpunimit industrial dhe/ose prodhimit të produkteve të duhanit është e vlefshme për 10 (dhjetë) vjet, me të drejtë përtëritje.

5. Leja e përpunimit industrial dhe/ose prodhimit të produkteve të duhanit, e miratuar, regjistrohet në regjistrime përpunuesve të duhanit dhe të prodhimit të produkteve të tij, pranë AKDC-së.

6. Ngarkohen Ministria e Bujqësisë dhe e Ushqimit dhe AKDC-ja për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Fatos Nano

